

HAMARTIOLOGY

(Chonset chung changa kihilna)

Paominlen Kipgen (PK), M.Th

BUNG – 1

CHONSET HI IPIHAM?

Dictionary in dan palkeh, thilsebol, mihem hindan houthu leh jalhang hinkho kimanchahna ding dan kistem palkeh ahi ati. Chonset hi natoh hihen lunggel hijongleh Pathen lungdei banga hinlou hi ahi. Chonset hi lhagao dinga kinepna umtalou suhdam theilou natna ahi. Chonset hi imilui hina, tahsa le eima ngaichatna chu ahi. Chonset hi thuman lou leh kiphin jong ahi.

1st John 3:4 na'a "Chonset hi danthu palkeh ahi" ati.

1. Chonset hi natoh ahi – danthu leh thupeh ho palkeh hi chonset ahi
2. Chonset hi idinmun/hina (state) ahi – chonphatna beija amangthah ho hinkho/dinmun ahi.
3. Chonset hi hina (nature) ahi – mangthah ho Pathen melma hina adin munu ahi.

Greek Bible Thulhunthah'a chun Chonset kiti hi thucheng ni'in anoija banghin ahilchenne.

1. **Hamartema:** Greek paova '*Hamartema*' kiti sappaova 'to miss a mark' ahin, eipaova "Abidoina ahilouleh abimun khahlou, doikhel" atina ahi. Ajehchu Adam chu Pathen'in Ama loupina dingle amabou vahchoi dinga anasem ahin, Adam'in Pathen thupeh ana palkeh'a, Satan thusei joh anajop tahjeh chun Pathen deisahna mun chu adoikhel ahitai. Paul'in Adam jalin vannojjah chonset ahunglutin, Adam sukhel banga sukhel louho chung jong Adam vangin chonsetnin vai alotai atina jeh chu ahi (Rom. 5:12). Ajehchu Adam'in adoikhel jeh'a chu ason achilhah jousen jong adoikhel gamtaovin; hijeh hin mijousehi chonse ahitaovin, Pathen loupina chu changjoulou ahitaove (Rom.3:23). Chonset man chu thina ahung hitai (Rom.6:23).

2. **Parabasis:** Greek paova "*Parabasis*" tihin sappaova 'to uverstep a forbidden line/crossing the line' ahin, eipaovin "akijah dana gol kallhah" atina ahi. Hiche thucheng hilchetna dungjuija hi Adam in henasa'a Pathen daan thupeh chu ana palkeh ahitai tina ahi. Bible'in danthu palkeh chu chonset ahi ati (1 Jn. 3:4; Jacob. 1:14-15).

BUNG – 2

CHONSET HUNGKON DOHNA

Chonset kiti hi Pathen'a kon hungkipan ahapon, Pathen hin boldoh jong ahapon, chuleh ama chamtah'a hungmoh umdoh jong ahipoi. Amavang Pathen vantil ho lah'a lamkai pipu Lucifer/Satan na kon hung kipan ahi (Isai. 14:12-14; Ezk. 28:14).

Lucifer kitihi Cherubim vantilho lah'a thaonu Cherub khat ahin (Ezk. 28:14), Pathen'in chihna dimsetle hoina bukima anasempa chu ahi (Ezk. 28:12-13). Amahin achihna leh ahoina chuleh

aloupinaho jeh hin asempa Pathen chu ahindeh tan, chuleh ahung kichoisang tan ahi (Ezk. 28:15-17; Isai. 14:13-14).

Lucifer hin Pathen khat banga alaltouna chungsanga dosanga, avantil chanpiho chu kihousah'a, kijensah ding tihi lungin ahinvoptan ahi. Pathen'in agounpeh achan dingdol bepma alung oi jou tahlou phatchun Pathen'in jong vana kon chun leisetna ahin nolhatan ahile Lucifer kitipa vantil pipupen chu dan susepa Satan ahungsoh tan ahi (Ezk. 28:14-15; Isai. 14:12-15). Lucifer hi Pathen dou leh melma ahung hitah jeh chun SATAN kiti minthah khat ahung changtan ahi (1 Sam. 29:4; 1 Kgs. 5:4; Ps. 38:20).

BUNG – 3

VANNOIJA CHONSET HUNGLUT PATNA

Chonset hungkon dohna abulpi chu Lucifer (satan) ahin, chuleh leiset mihemte chungsa chonset hunglut patna chu Adam kon ahi (Gen.3). Pakai Pathen'in Adam henga chun, 'honsunga theiga jouse hi naneh thei sohkei ding ahinai, ahin alailunga sele pha hetna theiga vang khu naneh nini nathi teiding ahi' tia anaseisa Adam'in ananeh tahjeh'a chu hiche thina chun achunga vai ahom ahitai. Hiche jeh'a chu ason achilhah te chungsa jong hiche thina hin vai alosoh ahitai (Gen. 2:17-19). Hiche thupeh hi Adam changseh honsunga aumlai ja anapeh ahi (Gen. 2:15-16).

Setan chun Adam joh lhemgo louvin Eve joh chu ahin lhemtan ahi. Satan (gul) chu Eve henga achen ajah'a "honsunga theiga jousehi naneh theisoh lhonding hinam?" ti'a adohleh Eve chun, "alailunga selepha hetna theiga tilou adang jousehi kaneh thei lhonding ahinai" ati. Ahin alai lunga seleh pha hetna theiga vang khu naneh theihon louding, tohjong natoh khah lhonlou ding ahi tin aseije atiphat chun, gul/satan chun Pathen'in ajou asej ahibouve atipeh tan ahi.

Gulchun hiche theiga khu hin nelhonle chun namitlam lhon hung kikeodoh intin, Pathen banga thilpha thilse hetheija nahung umlhon ding ahijeh'a chu najahda lhon ahibouve atiphat chun Eve chun atahsanin anetan, chuleh ajipa Adam jong anehsah tai.

Hichun amitlam lhon akikeo doh tahbeh tan, achonsetna lhon akihetdoh lhontan, Pathen mai amungam lhon tapon, Pathen toh akijop matna lhon chu atantai (Gen.3?7). Hijeh'a chu Adam chonset jeh'in vannoijah chonset ahung lutnin, chonset jeh'in Adam chonset bang sukhelna neilouho chungsa jong thinan vai alotai. Adam chonsetna jeh'in mihemte chungsa chonset thina jat thumjen'in vai alosoh tan ahi (Gen. 2:17; 3:19; Eccl. 12:7).

1. **Tahsa thina:** Tahsa thina akiti tengleh lhagao le tahsa kikhena kiseina ahi (Eccl. 12:7). Chonset jeh'a chu tahsa thina gaosapna chu anachang lhona ahitai (Gen. 3:19). Adam le Eve chu Pathen thupeh bang chun anaum jing lhonleh hitobang tahsa thina chu anato lhon louding, hingjing ding ahilhone.

2. **Lhagao thina:** Lhagaova thina kitih Lhagaova Pathen toh kikhena kiseina ahi (Gen. 2:17; Rom. 5:21; Eph. 2:1,5). Adam chonsetna chun Pathen toh akiloikhomna chu asuhken ahi (Isai. 59:2; Gen. 3:7-11). Hijeh'a chu mihem ahipeh jenga jong chonsetna hingho chu athisa'a kisei ahi. Ahin, hiche

chonstna jeh'a thina chu Pathen lhagaova Penthahna'a kona kithah jopmat kitna umtheija ahitai (Lk. 15:32; Jn. 5:24; 8:51; Eph. 2:5).

3. **Tonsot thina:** Hiche tonsot thina kitihl lhagaova Pathen toh kikhenna bana tonsot geija Pathen toh kikhenna ding chu ahi (Mtt. 25:41; 2 Thess. 1:9; Rev. 14:11). Tonsot thina ahilouleh Pathen toh kikhenna kitihl Lhagaova Penthahna neiho dinga umlou ding ahitai. Ajeh chu Christa'a Pathen toh kichamna neiho dinga chu tonsot Pathen toh umkhom kit theina aumtah jeh ahi (Jn.5:25; Eph. 2:1,5).

BUNG – 4

CHONSET KIPHONDOH/KILAT DOHNA HO

1. Palkeh (transgression) – danthu ija selou va bol. Ps. 51:1 in danthu kapal kehna'a kon neihuh doh'in ati.

2. Suikhel (iniquity) – thildihlou khat kibol ahilouleh phal hilou khat bol.

3. Dihlou na(error) – Adih'a kon kiheimang (Ps. 51:9).

4. Abidoi khah lou (missing the mark) – I Jn. 5:17; Rom. 3:23.

5. Danthu neilou/juilou (lawlessness) – I Tim. 1:9.

6. Bat (debt) – bolding khat bollouva koi.

7. Tahsanlou (unbelief) – Heb. 3:12.

BUNG – 5

BIBLE DUNGJUI JA CHONSET HO

1. Exodus 20:3-17 (Thupeh som): Pathen tampi nei, milimhou, gaosap, Pathen ni nitlou, nulepa jalou, tolthat, jon, guhchat, jousei, hengle kom neilegou thille lo o'chat.

2. 1 Cor. 6:9,10 – mijong, thilhahou, mijigem, mihuh, palepa kikoi/nule nu kikoi, gucha, neipap kilose, jukham, hanset, minambol.

3. Romans 1:29-32 – engset, papset, suhset lung dimset, thangset lung, tolthalong, kinahna, kidohabol, doulungpu, guhthimma miseiset, mihou tom, chonval, hoitho, kithangat, nulepa thu'a nunglou, lungthimbei, thutepsa sukeh, hepina neilou, lungsetna neilou.

4. 1 Timothy 1:9-11 – Dan sukeh thu'a nunglou, abohho, athenglou, pathat, nuthat, mithat, mijong, pa le pa kikoi, mihemgu, mijou, jouva kihahsel

5. Colossia 3:5-8 – Jon, thenlou, huh, gitlou lungtup, papset, milim hou, lungsat, lunghan, mitthip, houset taitom, kam sunga kona thujahmo sei, thujouva kihou.

6. Galatia 5:19-21 – Jonthanhoi, thenlou, huh, milim hou, doichoi, kidou, kinah, kinel, kimitthip, lunghan, loitumsem, kilangkhin, kibungkhen, kithangset, jukham, eltolgolnop bol.

7. Mark. 7:20-23 – Lung gilou, jonthanhoi, guchat, toltha, miji toh jon, papsetna, gitlou engset, mi duhabol, huhna, kimit thipna, kitaiton, hoitho, ngolna.

Hicheng ho lah'a hi akibang holah'a jong khatkhat cheh ilah doh leh chonset hi 50 val akimun ahi.

BUNG – 6

CHONSET JEH'A THILHUNG (Result)

1. Thina – Rom. 6:23.
2. Man na – Pathen nakon manna, vangamma kon manna (Lk. 15:24).
3. Themmo channa – Pathen thutanna maija themmo channa – Jn. 3:18.
4. Lungsunga themmo kichanna (guilt) – Gen. 26:10.
5. Manthah na (perdition) – 1 Tim. 6:9.
6. Jepna (punishment) – Mtt. 25:46.
7. Tonsot meidil (Eternal fire) – Jude. 7.
8. Dammun (Hell) – Mtt. 25:41, Diabol le anungnui ho lhunna ding.
9. Meikong deuje ju (Lake of fire) – Thini na chan na (Rev. 20:14).

BUNG – 7

CHONSETNA'A KON DAMNA LAMPI

1. Christa mi Lhatdamna le athokitna bou chu chonset na kon damna ahi (Jn. 1:29; 1 Jn. 3:5).
2. Koima achangseh/amachamin chonsetna'a kon akisoptheng theipoi (Job. 9:30,31; jer. 2:22).
3. Chonsetna'a kon damdohna chu Christa thisan vanga ngaidam chan na kon ahi (Eph. 1:7; 1 Jn. 1:7)
4. Koimacha chonsetna neilou aumpon, mijousen Huhhingna angaicha cheh'e (Gal.3:22; Rom.3:23).

BUNG – 8

SATAN

Christiante galbol hi imelma lentah'u Satan, Diabol kitipa toh kisas ihuive. Mihem chu lhez lhah'a aumji tengle satan na kihi ji, Pathen'in achan dinga agonpeh dammun chu satan ichankhompji jiu ahi. Hijeh'a chu Bible'in Satan chu kisaspi dingle mun'ot lou dinga eihilu ahi.

1. SATAN HUNGKON DOHNA

Col. 1:16 dungjuija Satan hi itih lai hamkhatna chu Pathen'in anasem ahi.

Ezek. 28:12-19 na'a satan kiseina'a satan kimudung juijin

I. Satan hi chihna dimset leh melhoina chamkim ahi (v.12).

II. Songmantam jouse, songdul, emerald, carnelian, Topaz, jasper songmantam jouse akijepna chu ahi (v.13).

III. Ama chu thaonusa cherub, vantilho jouse lah'a alenpen leh alalpen hiding ahi (v. 14).

IV. Amelhoi jehle aloupi jeh'a kiletsah ahi (v.17).

V. Chonsetna asunga aum kahse'a chu nolnabei le chamkim ahi (v. 15).

VI. Chonset le bohna jouse ama'a mudoh ahi (v 16).

VII. Satan chu vangam Pathen umna munna kon deldoh ahitai (vv.16-18).

Chuleh Isaiah 14:12-17 na'a kimu dungjuijin

I. Ama chu Lucifer, khovah chapa akiti (v.12)

II. Akiletsahna chun Pathen chungnung tobang hiding atupme (vv. 13,14).

III. Alhunna ding chu khuh sunga kotong thulai, damun ahi (v. 15).

Satan chu vangama kon paidoh ahito lhonna tu'a hi vanlai jola uma ahi (Eph. 2:2). Satan hin tujengin jong vangama che'a tahsanho themmo gachan theina anei nalaije (Job. 1:6-12; Zech. 3:1). Hiche thanei nahi Rev. 12:10 guilhun kah se'a hiding ahi.

2. SATAN MIHEMTOBANG AHINA (Personality)

Tulai mitamtah'in satan mihem bang ahina atahsang pouvin, mihem tahsa'a lunggel dihluou bouhi mihem setna hidanin agelui. Ahin Jesun Jn. 8:44 na'a 'napau diabol' atikhun satan chu mihem tabang 'pa' hina changthei ahi avetsah'e. Job. 1:6-12 'a Satan Pathen toh akihoulim thei danhi mihem ahina ahin, Jesu lhez patepma aumna'a Mtt. 4:1-12 Jesu chu mihem tahtah satan tochun kinel ahi.

Hijeh chun satan hi mihem tahbeh tobang hina nei, chihna nei, thulhuh semtheina nei le lunggel nei ahi. Ahin satan chu lhagao thanei tah ahijeh'in mihem tobang tahsa aneipon, milima kitem banga aki, aha, amei neijong ahideh poi.

3. SATAN HINNA/NATOH HO (Character)

I. Gucha ahi. Mtt. 13:19 Diabol hin Pathen thu chu angaiho'a konin agumang jin ahi.

II. Alhem, milheplhah nadinga lim chompu ahi (2 Cor. 11:3). Tekahnan Eve koma ache'a chun gul lima achen, atahsa tah hilou thildang alhema achen agalhemlhai.

III. Tolthat - Jn. 8:44 na'a atilla pat tolthat ahi ati.

IV. Jousei ahi - Jn. 8:44 na'a 'ama'a chu thutah umlou..... mijou ahi' ati.

V. Milhemlha ahi - Rev. 12:9 'a 'satan in vannoi leiset alhem lhai ti akimui'.

4. SATAN TITLES (Minho)

I. Avah'a vah vantil (2 Cor. 11:13-15)

II. Keipi kitum (I Pet. 5:8)

III. Vanlai jolla thanei lengchapa (Eph. 2:2)

IV. Muthim thaneipa (Col. 1:13)

V. Dragon, gul, diabol le satan akiti (Rev. 12:9)

VI. Vannoi leiset lengchapa/lengpa (Jn. 14:30)

VII. Leiset Pathen (2 Cor. 4:4)

VIII. Kokhuh monbei lengpa, Hebrew'a aminchu 'Abaddon' akiti (Rev. 9:11).

5. SATAN NATOH

I. Vallhum ding hol (I Pet. 5:8)

II. Changlhem leh thuhil dihluu tu (Mtt. 13:25,30)

III. Mihem lunggel mitchotsah (2 Cor. 4:4)

IV. Sopi ho hehset (Rev. 12:10)

V. Christian ho sepchil/ patep (Lk. 22:31)

VI. Mihem tahsa suhset ding (I Cor. 5:5).

6. SATAN LHACHA NATONG HO

I. Satan vantilho, lhagao gilou, lhagao thenglou leh diabol (2 Pet 2:4, Jude. 6)

II. Pipuho, thahat thaneiho, vannoi muthim vaipoho leh van munho'a lhagao gilou engseho (Eph. 6:12)

III. Michonse alungdei lam bolho (Jn. 8:44).

IV. Mitheng ho jengjong khatvei veile ahet lou'u leh kiging louhelin amangcha jin ahi. Tekahnan Mtt. 16:22,23'a Peter.

7. SATAN LHUNNA DING

I. Vangama kon paimang paipai hiding (Rev. 12:7). Tuchanna hi satan'in vangam agaphah thei nahlai ahin, khatveileh vangamma kon pai doh mongmong hunghiding ahi.

II. Chujou teng satan chun mihemho Pathen doudinga ahin tildoh ding (Rev. 12:12)

III. Chuteng vantil in ahentup ding (Rev. 20:1-3)

IV. Kokhuh mongbeija kumsang khat sunga dinga selut hiding (Rev. 20:3)

V. Hiche jouteng chuleh phat chomkhatna dinga lhadoh hiding, mihemho chu Pathen dou dinga kiphin dinga alheplhah ding (Rev. 20:7,8)

VI. Akhonna leh satan chu jo hi'a tonsotna dinga meidil la lelut hiding ahi (Rev. 20:7-10).

BUNG – 9 VANTIL GILOU

1. VANTIL GILOU KIHEN HO

Hiche vantil kihen kitihohi vantil gilou engse dehset kiti ho chu ahiuve (2 Pet.2:4). Ajehchu amahohi chamlhatna peh'a ongthol tah'a koi aphot louna diu tampi aumding jeh ahi. Thupi tanna lthinkah'a dinga Pathen'in dammuna ahen/ akoiju ah tin Bible'in aseije (Jud.6; 2 Pet.2:4).

Gen 6:1-7 sunga mihem chanute kichen pi'a kisei Pathen chapate kitiho khu vantil gilou engse kitiho chu ahiuve kitileh kiseikhel louthei ahi. Ajeh chu thulhunlui phatlai chun vantilho bou chu Pathen chapate tia ana kiseiju ahi (Job. 1:6, 2:1; 38:7; Gen. 6:2). Ahin mihemte Pathen chapate ti'a ahung kiminhah patna hi Thulhun thah'a John. 1:12 "Ama anasanga ama mina tahsan chan chu Pathen chapate hitheina thaneina apetai" kiti'a kona bou mihem tehi Pathen chapate tia hung kiminhah pat ahibepme.

Chukitle vantilho thudolah Bible'in vantil hohi pasal hina le numei hina neilou danin aseipon, Pathen danthu noija um vantilho chu chale nao chile nam chuleh inchen louchen semdoh dingin ana sempouve tithu bou ahi (Mk. 12:25). Ajeh chu Hebrew Grammer'a chun vantil hohi pasal hina (masculin) in aseijin ahi. Hijeh chun Pathen danthu noija um talou'a Pathen douna pang vantil gilou engseho vang chun mihem banga mihem numei hotoh kichenga mihem consetna banga chonse thei ahiuve tihi tahsan lel ding ahipoi (Job. 1:6-12). Hiche chonset nahin Pathen jengjong amisem sate chungu akisah losah leuvin ahi (Gen. 6:12).

2. VANTIL GILOU KILHA ONGHO (CHAMLHATHO)

Hiche vantil gilou chamlhat kitihohi van munho'a lhagao gilou engse ho khu ahiuve (Eph. 6:12). Hiche vantil gilou engse chamklhat kiti hohin vanmun Pathen koma aumlai juva akivaipoh tobang uchun, tunjong vanlajola vanmun nina'a khun kivaipohna thalhingset neijin aumun ahi (Eph. 6:12).

Amaho hin tu'a aumnao vanmun ho'a konahi chungle noi akoptouva Pathen le Pathen mite douna jenga na atoh jingu ahi. Ahin amahohin Pathen phalna kalvalin na atong theideh pouvin ahi (Job. 1:12; I Cor. 10:13).

Pathen chate chung a Satan natohna atamjohi Pathen thusah'a achate kistem hoina dingle kitoitahna dinga Pathen phatsah jong aumin, kisu dihnah jong aumin, Pathen'in achate avenbitna jong ahi. Ahin Pathen thusah kalvalin satan in na atong thei dehpoi (Ps. 125:3; Job. 1:12; I Cor.10:13; Job. 42:1-6).

Ajeh chu leiset na umnai mitheng hohi Pathen'in chamlhat tah'in khoihen lang hileh chonsetna thilhoa lhamang thei ahijeh uva chu gamgi akhenpeh uva dankhat noiija akoiju ahi.

BUNG – 10 DEMONOLOGY THILHA/LHAGAO GILOU

Lhagao gilou ahiloule thilha aumhi masang laipeh'a pat leiset chung mihemho jousen ana tahsanu ahitai. Hiche lhagao hi athisa ho, mithisa ho lhagao hungkile kitna ahingnalai ho hung sugenthei danin ana tahsanun ahi. Thilha kamui ti'a seihon mihem danin amu uvin, ahilou jongleh ganhing, ahilouleh adangdang kichat umtah'a mudanin aseijui. Chuleh ahim himma thilha hi mutheilou lhagao ahi. Jesun jong thilha aum atahsanin, chuleh thilha vop jong ana nodoh'e ti akimui. Ahileh thilha hi tulaija um nalaijem? Aume.

1. THILHA HUNG KONDOH NA

I. Satan chu Pathen douna achonset (Isai.14:2-20; Ezk. 28:11-19) chun kimkhat tahsan dungjuijin ama chang chonset hilouva vantil honkhat toh hithao ahin; ama chu alamkaiju ahi atiuve. Satan chu nolhah ahi'a chu avantil tetoh pailhah hitha'a hiche vantil kipailha ho chu thilha kiso'u ahi atiuve. Mtt. 12:26 na'a satan chu Diabol lenggama lengpa ahi ati.

II. Kimkhatnin Gen. 6:1-6 na vantil leisetna hunga leiset mihem numeiho to kichengho chun cha ahinu, hiche achateu mihat miminthang ti'a kile *giants* kitiho, mitobang louva hat le boltheiho chu athi jouvuvu thilha kiso'u ahi atiuve.

III. Kimkhatnin hiche thilha hohi Adam madanga anahing ho (pre-Adamic race) Gen. 1:1-2 kah'a anamang kiseiho ahi atiuve. Jer. 4:23-26 dungjuijin amasanga chu mihem ana uma, leiset asetna chu amaho chu thilha kiso ahi atiuve.

2. TULAI THILHA UMDAN

Bible dungjuijin Jesu khanglai chun thilha/lhagaoboh ana tamlheh'e. Ahin tulai mihem ho science lam le chihna lama akhantouvu toh kilhonin Bible'a thilha aumme ti'a kisei hi apaidoh'un, totnan agel taovin ahi. Ahin NT'a thilha aume ti tahsana akiphot chena bana John'in Rev. 9:20 na'a chun ahunglung ding phat (tribulation) sunga mihon thilha ahoudiu jong aseije. Tulai jengin jong thilha hou tampi aumin, chuleh thilha mu leh thilha'in avopma mihem kam mangcha thilha'in thu asej, na atoh aume.

3. THILHA HINA HO

I. Matthew 8:16 dungjujin thilha hi lhagao ahin, Jesun ana nodoh'e.

II. Mark 1:23 na'a thilha hi lhagao boh akitin, ani'a hi kibang, thilha kiseina ahicheh'e.

III. Thilha hi lhagao ahijeng vangin mihem tobang hina aneijin (personality), chingtah in akiseije (Mk. 5:10; Lk. 4:34; Gen. 3:1; 2 Cor. 11:14). Hitobang hetna aneijeh'un mihem hon ahunglung ding hetnomnan amaho adong jiuvin, thilhaho chu ahunglung ding phatna thilsoh ding, leh thilmang thu adong jiuvin ahi.

IV. Thilha hohi thenglou tah in akiseije – morally unclean (Mtt. 10:1; Mk. 1:27; Rom. 6:13; Lk. 8:27).

V. Amahon hatna, mihem ngaina sanga hatna (super human strength) aneijun, hijeh chun thilha vopho chu mitampi pin atuh jiuvin ahi.

VI. Chuleh thilha hohin mihem chu paomosahna, mitchotsah, ngolsah, amale ama kithasahna tha aneijun ahi.

4. THILHA NATOH

I. Amahon Pathen adouvun, alung ngaitoho chu suhset ding agouve. Satan chu tahsan ho themmo chana pang ahin, amahi phatkhatna munkhatna bou umthei ahijala asoh ho thilhaho chun ahenga thu ahinpoh peh'uva, chuleh aman tahsanho chu Pathen henga ahehset ji ahi (Rev. 12:10; 2:13).

II. Amahon mihem ho adouvun, anatoh'u le akhantouvu suhtang ago jingui (Job. 1:12). Chuleh Luke 13:16 na'a numeikhat kum 18 thilongin aumsah'un ahi. Satanhi thanei (omnipotent), ijakai hesoh (omniscient) leh munjouse'a um (Omnipresent) ahipon, hijeh'a chu anatoh ding atamjo hi thilhahon aboluva, thilha hochun mihemho chu atahsa leh alungthimu asuhset ahi (Mk. 1:23-27; 5:1-20).

III. Thilha hohi Pathen'in jong amangcha ji'e. I Kgs. 23:23 na'a Ahab henga thujou seidingin apansah'in, Rev. 16:13-16 'a Armageddon galla dinga Pathen douva nam miho chu akhop khomsah'in ahi.

5. THILHAHO KILOIKHOMNA, KIVAIHOMNA (Organization)

I. Rev. 2:13 na'a satan touna chu Pergamos ahi atin, hiche jouva patna chu muntina kichon le dinga tahsan um ahi.

II. Satan hin thilha tampi hoitah'a kiloikhom chungu chu na atoh ahi (Dan. 7:19,20; Rev. 12:4,7).

III. Satan lenggam chu kisumo dehduh mipi kiloikhom lah ahipon (Mtt. 12:26), ahin hoitah le sangtah'a gitlouna'a kiloikhomna ahijoi.

IV. Satan in mipengthah lou holah'a kiletsahna, lungtup dihluu, thangthipna, human leh nopsah na vaipohna mangchan vai ahomme (Jn. 14:30; 18:36; Eph. 2:2; 6:12; 1 Jn. 2:5-17).

V. Satan hin Lhagao gilou holah'a lengvai apoh ahin, tujengin jong vantil chonse ho muthim noijsa hentup le phasa demma umnalai ahi (Jude. 6).

6. THILHA HO LHUNNA LEH MANTHAH NADING (Doom)

I. Satan banga thilha ho manthah na dinghi Jesun Calvary'a chu mahor anamkhum ahitai.

II. Lei'ong hi thilha ho lhuna leh gotna achanna mun chu ahi (Rev. 9:11).

III. Thilha hon amanthah nao ahungnai aheuve (Mtt. 8:29).

IV. Satan leh thilha ho manthah nading munchu tonsot meidil chu ahi (Mtt. 25:41).

7. THILHA HOUNA NATOH

I. Miit pheldoi (Divination) – Lev. 20:27 ahunglung ding mu leh sei.

II. Gaochang (Necromancy) – Athiho lhagao to kihouthei (I Sam. 28:8; 2 Chr. 33:6; Lev. 20:6)

III. Phunsan (Prognostication)–Ezk. 21:21–Gancha mangcha'a gaothil bol.

IV. Doi (magic) Gen. 41:8, Egypt mite science, lhagaova konna vanlamthil hetna leh ahunglung ding hetna, tulai jenga jong milung gahsuh ngol, ahunglung ding seina, damsahna akimang jing nalai jin ahi.

V. Ailhim (Sorcery) – Isai, 47:9-13; cf. Acts. 19:18,19

VI. Doichoi (witch craft) – Gal. 5:20; I Sam. 15:23 – Thilha houva amatoh kiguijop